

駢體文鈔

冊二

卷之三

三

駢體文鈔卷三

雜颺頌類

王子淵聖主得賢臣頌

○○○風骨學於諸子華實化於騷賦譬之
拳勇純以筋節運神氣不露聲色所以

為高

此非頌體後人亦遂無效之者

夫荷旃被毳者難與道純繇之麗密羹藜噲糗者不足與論太牢之滋味今臣僻在西蜀生於窮巷之中長於蓬茨之下無有游觀廣覽之知顧有至愚極陋之累不足以塞厚望應明指雖然敢不略陳愚心而抒情素記曰共惟春秋法五始之要在乎審己正統而已夫賢者國家之器用也所任賢則趨舍省而功施普器用利則用力少而就効衆故工人之用鈍器也勞筋苦骨終日矻矻及至巧冶鑄于將之璞清水淬其鋒越砥斂其罅水斷蛟龍陸剽犀革忽若彗汜畫塗如此則使離婁督繩公輸削墨雖崇臺五增延袤百丈而不溷者工用相得也庸人之御駑馬亦傷吻弊策而不進於行胸喘膚汗人極

馬倦及至駕齧膝驂乘旦王良執靶韓哀附輿縱騁馳驚忽如景靡
過都越國蹶如歷塊追奔電逐遺風周流入極萬里一息何其遼哉
人馬相得也故服絺綌之涼者不苦盛暑之鬱燠襲狐貉之煖者不
憂至寒之淒愴何則有其具者易其備賢人君子亦聖王之所以易
海內也是以嘔喻受之開寬裕之路以延天下之英俊也夫竭智附
賢者必建仁策索人求士者必樹伯迹昔周公躬吐捉之勞故有圍
空之隆齊桓設庭燎之禮故有匡合之功由此觀之君人者勤於求
賢而逸於得人。人。人。臣。亦。然。昔。賢。者。之。未。遭。遇。也。圖。事。揆。策。則。君。不。用。
其。謀。陳。見。悃。誠。則。上。不。然。其。信。進。仕。不。得。施。効。斥。逐。又。非。其。愆。是。故。
伊尹勤於鼎俎太公困於鼓刀百里自鬻寧戚飯牛離此患也及其
遇明君遭聖主也運籌合上意諫諍卽見聽進退得關其忠任職得
行其術去卑辱與渫而升本朝離蔬釋躄而享膏梁剖符錫壤而光
祖考傳之子孫以資說士故世必有聖智之君而後有賢明之臣故

虎嘯而冽風龍興而致雲蟋蟀埃秋吟蟬游出以陰易曰飛龍在天
利見大人詩曰思皇多士生此王國故世平主聖俊又將自至若堯
舜禹湯文武之君獲稷契臯陶伊尹呂望之臣明明在朝穆穆布列
聚精會神相得益章雖伯牙操遞鐘蓬門子鸞烏號猶未足以喻其
意也故聖主必待賢臣而宏功業俊士亦俟明主以顯其德上下俱
欲懽然交欣千載壹合論說無疑翼乎如鴻毛遇順風沛乎如巨魚
縱大壑其得意如此則胡禁不止曷令不行化盜四表橫被無窮遐
夷貢獻萬祥畢臻是以聖主不徧窺望而視已明不單頃耳而聽已
聰恩從祥風翱德與和氣游太平之責塞優游之望得遵游自然之
勢恬淡無爲之場休徵自至壽考無疆雍容垂拱永永萬年何必偃
印誦信若彭祖响嘘呼吸如喬松眇然絕俗離世哉詩曰濟濟多士
文王以寧蓋信乎其以寧也

引喻處皆有噴薄之氣有神無迹

司馬長卿封禪文

○

襲舊六爲七此是何等志趣海嶽瑰狀金石奇聲不可無一不能有一

以允蒼兢業立意故極波涌雲亂之觀而仍字字有歸宿此意揚班已不能窺况其下乎

伊上古之初肇自昊穹兮生民厯撰列辟以迄於秦率邇者踵武逖聽者風聲紛綸葳蕤湮滅而不稱者不可勝數也繼昭夏崇號諡略可道者七十有二君罔若淑而不昌疇逆失而能存軒轅之前遐哉邈乎其詳不可得聞已五三六經載籍之傳維見可觀也書曰元首明哉股肱良哉因斯以談君莫盛於唐堯臣莫賢於后稷后稷創業於唐公劉發跡於西戎文王改制爰周邽隆大行越成而後陵遲衰微千載亡聲豈不善始善終哉然無異端慎所由於前謹遺教於後耳故軌迹夷易易遵也湛恩濛涌易豐也憲度著明易則也垂統理順易繼也是以業隆於襁褓而崇冠於二后揆厥所元終都攸卒未有殊尤絕迹可考於今者也然猶躡梁父登泰山建顯號施尊名大漢之德濶涌原泉沕涌漫羨旁魄四塞雲尊霧散上暢九垓下泝八

挺懷生之類。霑濡浸潤。協氣橫流。武節飄逝。邇陝遊原。遐闊泳沫。首
惡湮沒。闇昧昭哲。昆蟲凱澤。回首面內。然後囿騶虞之珍。羣傲麋鹿
之怪。獸彘一莖六穗。於庖犧雙貉共牴之獸。獲周餘珍。收龜於岐。招
翠黃乘龍於沼。鬼神接靈。圍賓於間。館奇物譎詭。俛儻窮變。欽哉符
瑞臻茲。猶以爲薄。不敢道封禪。蓋周躍魚隕。杭休之以燎微。夫斯之
爲符也。以登介邱。不亦慝乎。進讓之道。何其爽歟。於是大司馬進曰。
陛下仁育羣生。義征不懣。諸夏樂貢。百蠻執贄。德侔往初。功無與二。
休烈浹洽。符瑞衆變。期應紹至。不特創見。意泰山梁甫設壇場。望幸
蓋號。以况榮上帝垂恩。儲祉將以薦成。陛下謙讓而弗發也。挈三神
之驪。缺王道之儀。羣臣慝焉。或謂且天爲質闇。珍符固不可辭。若然
辭之。是泰山靡記。而梁父靡幾也。亦各並時而榮。咸濟世而屈。說者
尙何稱於後。而云七十二君乎。夫修德以錫符。奉命以行事。不爲進
越。故聖王不替而修禮。地祇謁款。天神勒功。中嶽以章。至尊舒盛德。

發榮號受厚福以浸黎民也。皇皇哉斯事天下之壯觀王者之不業不可貶也。願陛下全之而後因。雜薦紳先生之略術使獲耀日月之末光。絕炎以展寔錯事。猶兼正列其義。校飭厥文。作春秋一藝。將襲舊六爲七。攄之無窮。俾萬世得激清流揚微波。蜚英聲騰茂實。前聖之所以永保鴻名而常爲稱首者。用此宜命掌故悉奏其義而覽焉。於是天子沛然改容曰。愉乎朕其試哉。乃遷思同慮。總公卿之議。詢封禪之事。詩大澤之博廣。符瑞之富遂。作頌曰。自我天覆雲之油油。甘露時雨。厥壤可游。滋液滲漉。何生不育。嘉穀六穗。我稽曷蓄。非唯雨之。又潤澤之。非唯濡之。汎專獲之。萬物熙熙。懷而慕思。名山顯位。望君之來。君乎君乎。侯不邁哉。般般之獸。樂我君圃。白質黑章。其儀可嘉。旼旼睦睦。君子之能。蓋聞其聲。今觀其來。厥塗靡蹤。天瑞之徵。茲亦於舜。虞氏以興。濯濯之麟。游彼靈時。孟冬十月。君徂郊祀。馳我君輿。帝以享祉。三代之前。蓋未嘗有。宛宛黃龍。興德而升。采色炫耀。

煥炳輝煌正陽顯見覺悟黎烝於傳載之云受命所乘厥之有章不
必諄諄依類託寓喻以封巒披藝觀之天人之際已交上下相發允
答聖王之德兢兢翼翼也故曰興必慮衰安必思危是以湯武至尊
嚴不失肅祗舜在假典顧省厥遺此之謂也邁任之韻峻絕之骨奇
宕之氣蕭疏之神頌語
不襲商周幾欲抗手

楊子雲劇秦美新○○

心苦于司馬辭慎于孟堅衆流山立語語金
湯順逆集散與長卿或合或離細繹之乃

得文章機竅

誣善之人其詞游失其守者其辭屈此文之謂也然古藻駿邁之
氣則與長卿並驅矣

諸吏中散大夫臣雄稽首再拜上封事皇帝陛下臣雄經術淺薄行
能無異數蒙渥恩拔擢倫比與羣賢並愧無以稱職臣伏惟陛下以
至聖之德龍興登庸欽明尚古作民父母爲天下主執粹精之道鏡
照四海聽聆風俗博覽廣包參天貳地兼並神明配五帝冠三王開

闢以來未之聞也臣誠樂昭著新德光之罔極往時司馬相如作封禪一篇以彰漢氏之休臣嘗有顛胸病恐一旦先犬馬填溝壑所懷不章長恨黃泉敢竭肝膽寫腹心作劇秦美新一篇雖未究萬分之一亦臣之極思也臣雄稽首再拜以聞曰權輿天地未祛睢睢盱盱或玄而萌或黃而芽玄黃剖判上下相嘔爰初生民帝王始存在乎混混茫茫之時疊聞罕漫而不昭察世莫得而云也厥有云者上罔顯於羲皇中莫盛於唐虞邇靡著於成周仲尼不遭用春秋因斯發言神明所祚兆民所託罔不云道德仁義禮智獨秦崛起西戎邠荒岐雍之疆因襄文宣靈之僭跡立基孝公茂惠文奮昭莊至政破縱擅衡并吞六國遂稱乎始皇盛從鞅儀韋斯之邪政馳驚起翦恬賁之用兵剗滅古文刮語燒書弛禮崩樂塗民耳目遂欲流唐漂虞滌殷蕩周難除仲尼之篇籍自勒功業改制度軌量咸稽之於秦紀是以耆儒碩老抱其書而遠遜禮官博士卷其舌而不談來儀之鳥肉

角之獸狙獷而不臻甘露嘉醴景曜浸潭之瑞潛大第經竇巨狄鬼
信之妖發神歇靈繹海水羣飛二世而亡何其劇與帝王之道兢兢
乎不可離已夫能貞而明之者窮祥瑞回而昧之者極妖愆上覽古
在昔有憑應而尙缺焉壞徹而能全故若古者稱堯舜威侮者陷桀
紂况盡汛掃前聖數千載功業專用己之私而能享祜者哉會漢祖
龍騰豐沛奮迅宛葉自武關與項羽戮力咸陽創業蜀漢發跡三秦
克項山東而帝天下擿秦政慘酷尤煩者應時而蠲如儒林刑辟歷
紀圖典之用稍增焉秦餘制度項氏爵號雖違古而猶襲之是以帝
典闕而不補王綱弛而未張道極數殫闇忽不還逮至大新受命上
帝還資后土顧懷元符靈契黃瑞涌出澤渟沕涌川流海渟雲動風
偃霧集雨散誕彌八圻上陳天庭震聲日景炎光飛響盈塞天淵之
間必有不可辭讓云爾於是乃奉若天命窮寵極崇與天剖神符地
合靈契創億兆規萬世奇偉侔儻譎詭天祭地事其異物殊怪存乎

五威將帥班乎天下者四十有八章登假皇穹鋪衍下土非新室其
疇離之卓哉煌煌真天子之表也若夫白鳩丹鳥素魚斷蛇方斯蔑
矣受命甚易格來甚勤昔帝纘皇王纘帝隨前踵古或無爲而治或
損益而亡豈知新室委心積意儲思垂務旁作穆穆明日不寐勤勤
懇懇者非秦之爲與夫不勤勤則前人不當不懇懇則覺德不惜是
以發祕府覽書林遙集乎文雅之囿翺翔乎禮樂之場允殷周之失
業紹唐虞之絕風懿律嘉量金科玉條神卦靈兆古文畢發炳煥照
耀靡不宣臻式軫軒旂旗以示之揚和鸞肆夏以節之施黼黻袞冕
以昭之正嫁娶送終以尊之親九族淑賢以穆之夫改定神祇上儀
也欽修百祀咸秩也明堂雍臺壯觀也九廟長壽極孝也制成六經
洪業也北懷單于廣德也若復五爵度二壤經井田免人役方甫刑
匡馬法恢崇祇庸燦德懿和之風廣披摺紳講習言諫箴誦之塗振
鷺之聲充庭鴻鸞之黨漸階俾前聖之緒布濩流行而不韞韞郁郁

乎。煥哉。天人之事。感矣。鬼神之望。允塞。羣公先正。罔不夷儀。姦宄寇賊。罔不振威。紹少典之苗。著黃虞之裔。帝典闕者。已補。王綱弛者。已張。炳炳麟麟。豈不懿哉。厥被風濡化者。京師沈潛。句內匝洽。侯衛厲揭。要荒濯沐。而術前典。巡四民。迄四嶽。增封泰山。禪梁父。斯受命者之典業也。蓋受命日不暇給。或不受命。然猶有事矣。况堂堂有新政。丁厥時。崇嶽滄海。通瀆之神。咸設壇場。望受命之臻焉。海外遐方。信延頸企踵。回面內嚮。喁喁如也。帝者雖勤。惡可以已乎。宜命賢哲。作帝典一篇。舊二爲一。襲以示來人。擿之罔極。令萬世常戴巍巍。履栗栗臭馨。香含甘寶。鏡純粹之至精。聆清和之正聲。則百工伊凝。庶績咸喜。荷天衢。提地輦。斯天下之上則已。庶可試哉。轅句漸有轍跡劇秦處避重就輕辭

悉心苦

班孟堅典引

○辭義不能出馬揚之外

琢句益巧結體益順摹寫

裁密思靡遂爲駢體科律

語無歸宿閱之覺茫無畔岸此其所

以不逮卿雲

珍做宋版印

臣固言永平十七年臣與賈逵傅毅杜矩展隆郝萌等召詣雲龍門
小黃門趙宣持秦始皇本紀問臣等曰太史遷下贊語中寧有非
邪臣對此贊賈誼過秦篇云向使子嬰有庸主之才僅得中佐秦之
社稷未易絕也此言非是卽召臣入問本聞此論非邪將見問意開
寤耶臣具對素聞知狀詔因曰司馬遷著書成一家之言揚名後世
至以身陷刑之故反微文刺譏貶損當世非誼士也司馬相如洿行
無節但有浮華之辭不周於用至於疾病而遺忠主上求取其書竟
得頌述功德言封禪事忠臣效也至是賢遷遠矣臣固常伏刻誦聖
論昭明好惡不遺微細緣事斷誼動有規矩雖仲尼之因史見意亦
無以加臣固被學最舊受恩浸深誠思畢力竭情昊天罔極臣固頓
首伏惟相如封禪靡而不典楊雄美新典而亡實然皆游揚後世垂
爲舊式臣固才朽不及前人蓋詠雲門者難爲音觀隨和者難爲珍

不勝區區竊作典引一篇雖不足雍容明盛萬分之一猶啓發憤懣
覺悟童蒙光揚大漢軼聲前代然後退入溝壑死而不朽臣固愚戇
頓首頓首曰

太極之元兩儀始分烟烟煜煜有沈而奧有浮而清沈浮交錯庶類
混成肇命民主五德初起同於草昧元混之中踰繩越契寂寥而亡
詔者系不得而綴也厥有氏號紹天闡繹莫不開元於太昊皇初之
首上哉夔乎其書猶得而修也亞斯之代通變神化函光而未曜若
夫上稽乾則降承龍翼而炳諸典謨以冠德卓絕者莫崇乎陶唐陶
唐舍允而禪有虞有虞亦命夏后稷契熙載越成湯武股肱旣周天
迺歸功元首將授漢劉俾其承三季之荒末值亢龍之災孽懸象闔
而恆文乖彝倫斁而舊章缺故先命元聖使綴學立制宏亮洪業表
相祖宗贊揚迪哲備哉粲爛真神明之式也雖臯夔衡旦密勿之輔
比茲編矣是以高光二聖宸居其域時至氣動乃龍見淵躍拊翼而

未舉則威靈紛紜海內雲蒸雷動電燁胡縊莽分尙不蒞其誅然後
欽若上下恭揖羣后正位度宗有于德不台淵穆之讓靡號師矢敦
奮撓之容蓋以膺當天之正統受克讓之歸運蓄炎上之烈精蘊孔
佐之宏陳云爾洋洋乎若德帝者之上儀誥誓所不及已鋪觀二代
洪纖之度其蹟可探也並開迹於一簣同受侯甸之服奕世勤民以
方伯統牧乘其命賜彤弧黃鉞之威用討韋顧黎崇之不恪至於參
五華夏京遷鎬毫遂自北面虎螭其師革滅天邑是故誼士華而不
敦武稱未盡濩有敷德不其然與亦猶於穆猗卨翕純皦繹以崇巖
祖考殷薦宗配帝發祥流慶對越天地者烏奕乎千載豈不克自神
明哉誕略有常審言行於編籍光藻朗而不渝耳矧夫赫赫聖漢巍
巍唐基沂測其源乃先孕虞育夏甄殷陶周然後宣二祖之重光襲
四宗之緝熙神靈日照光被六幽仁風翔乎海表威靈行乎鬼區匿
亡回而不泯微胡瑱而不頤故夫顯定三才昭登之績匪堯不興鋪

聞遺策在下之訓匪漢不宏厥道至於經緯乾坤出入三光外運渾
元內霑豪芒性類循理品物咸亨其已久矣威哉皇家帝世德臣列
辟功君百王榮鏡宇宙尊亡與亢乃始虔鞏勞謙兢兢業業貶成抑
定不敢論制作至於遷正黜色賓監之事煥揚寓內而禮官儒林屯
用篤誨之士不傳祖宗之髣髴雖云優慎無乃憇與於是三事岳牧
之寮僉爾而進曰陛下仰監唐典中述祖則俯蹈宗軌躬奉天經惇
睦辨章之化洽巡靖黎蒸懷保鰥寡之惠浹燔瘞縣沈肅祗羣神之
禮備是以來儀集羽族於觀魏肉角馴毛宗於外囿擾緇文皓質於
郊升黃輝采鱗於沼甘露宵零於豐草三足軒翥於茂樹若乃嘉穀
靈草奇獸神禽應圖合諫窮祥極瑞者朝夕坰牧日月邦畿卓犖乎
方州洋溢乎要荒昔姬有素雉朱鳥元秬黃齏之事耳君臣動色左
右相趨濟濟翼翼峨峨如也蓋用昭明寅畏承聿懷之福亦以寵靈
文武貽燕後昆覆以懿鑠豈其爲身而有顛辭也若然受之亦宜勤